

La Ronda de Boltaña – In vino veritas

Nomás ascuitar o curdión d'ixa canción
preixiné que a nueit no feba que empecipiar.
A trompa, como un truen, se sintió por tot o mont.
Tant rancio yera o vin, que a yo me sabió a ron.
Con uellos royizos por culpa de bell porrón
vie aquella mesacha que mai miraba ta yo.
Con o vaso en a man, como gaita con bordón,
en ixé estrapalucio me deixé levar a o son.
Cantando IN VINO VERITAS, ¡Dos tragos, y a charrar!
Veritas, Veritatis... ¡En o vin ye a verdat!
Si pilló a ixa royeta, le ensenyo a declinar.
Pero a luenga ye un trapo si le pido bailar.

En o fondo a barra me trobé a o somarda Chuan.
Con sorna me dicié: -¿T'án vas, choven "padaguán"?
-Si "a fuerza m'acompanya", ista nueit pienso bailar,
u en rematar a zambra, griso o diya tornaré.
Como as royas fuyen, nos quedamos en o bar.
¡Atra nueit charrando yo con iste catantant
de suenyos imposibles y fer o mundo millor,
d'o fumo, as chamineras y as almendreras en flor!
Cantando IN VINO VERITAS y ¡Entibos, no! ¡No pas!
...que o río ye o camín. ¡Royo vin de l'amistat!
Glarimas en os uellos quan Chuan nos recordó
chilando por Madrit: Trasvase?...sí, ¡de cojón!

Dimpúes de bellas horas, no tot ye buen rollo.
Chilamos como cans quan se nos calienta o morro.
Con trazas de "cunyaus", sin parar de discutir.
¡Qué par de saputos... ¡A qué mas pedigrí!
En ixo que apareix a chirmana de Chuan.
-Fa que no te veigo dende a facultat.
D'as clases d'istoria fuyibanos t'o bar,
y con Plinio o Viello gosabanos brindar.
Cantando IN VINO VERITAS, un trago y atro mas.
¡Holio con a moceta, qué traza d'encubar!
Glarimas en os uellos, deixé plantau a Chuan
quan ella me dicié: -¡Carpe diem! ¿Quiers bailar?

...Y dos anyos dimpués, quasi tot sigue igual.
(A chirmaneta y yo ya ficiemos tío a Chuan)
¿Deixar de discutir?... En a mesa familiar
huei femos de verdat o cunyau en Navidat.

Letra y musica: Francho Sarrablo
Mosicos: La Ronda de Boltaña
Gravau en Estudios Kikos de Zaragoza



O Zaguer Chilo IV
Asociación Cultural Nogará – Religada

